

**MIC Pulau Pinang Yakin GTP Mampu Tarik Sokongan Kaum India
Bernama
27 Ogos, 2012**

GEORGE TOWN, 27 Ogos (Bernama) -- Program Transformasi Kerajaan (GTP) yang diilhamkan Perdana Menteri Datuk Seri Najib Tun Razak diyakini berupaya mengubah pola pengundian masyarakat India di Pulau Pinang pada pilihan raya umum akan datang.

Timbalan Pengerusi MIC Pulau Pinang, L. Krishnan berkata berdasarkan pemerhatian beliau, sebahagian besar masyarakat India di negeri ini telah kembali menyokong Barisan Nasional (BN) setelah melihat parti itu mampu melaksanakan perubahan dan menepati janji.

"(Perubahan itu) Dari segi mengurangkan jenayah, dari segi mempertingkatkan pendapatan rakyat tanpa mengira kaum, menyediakan peluang-peluang pekerjaan dan ini semua mereka lihat sebagai sesuatu yang baik," katanya kepada Bernama di sini pada Isnin.

Beliau berkata, kaum India di Pulau Pinang dapat merasai kesan program-program transformasi itu termasuk dapat bertemu dengan pemimpin kerajaan pusat untuk meluahkan masalah mereka ketika program pemimpin turun padang termasuk oleh Perdana Menteri.

Krishnan berkata MIC negeri kini memberi fokus dalam memperkasakan golongan belia dan warga emas, mempertingkatkan ekonomi kaum itu, memperkasakan pendidikan sekolah Tamil dan institusi pengajian tinggi, peluang pekerjaan di sektor awam serta masalah perumahan mampu milik dan kos rendah.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=690061>